



## 愛河

### — 記高雄氣爆事件

無親像彼陣過路 ê 風  
干焦會曉佇面頭前喝口號  
喝 kah 走音 sau 聲  
放蕩 ê 態度來來去去四界搨動  
一閃身就走 kah 無影無跡  
更加看袂起彼群外來 ê 湧  
不時 tiàm 耳空邊講閒話  
講 kah 喙角全波  
輕浮 ê 立場起起落落隨時反面  
頭前才公開行過 ê 跂跡尾後就會當一手全部抹消

阮早就佇遮落地釘根  
用千萬年 ê 時間一世人 ê 真情  
佇你 ê 身軀頂面刻出一條長長深深  
Kap 你 ê 血脈交接命運相連 ê 刺青  
並且用愛號名  
堅心守護  
一路行來毋捌有任何 ê 躊躇停步

彼个時陣你猶少年  
規身 ê 膽量滿腹 ê 氣魄開喙一聲喊喝  
就 kā 各路英雄好漢攏相招過來  
毋管是外島山地抑是東部西井  
無仝 ê 腔口講 ê 攏是仝款 ê 願望  
無論是行船做工猶有起厝排擔  
無仝 ê 頭路做 ê 攏是仝款 ê 美夢  
咱有約束欲鬥陣佇這個島嶼南方 ê 港都  
拍拚出來家己一片 ê 天地  
血汗透濫海洋 ê 氣味是你上迷人 ê 熱情  
日光 kap 月色是阮上意愛 ê 胭脂水粉

人性總是充滿考驗 kap 陷阱  
終其尾你猶是袂堪得繁華 ê 誘拐沉迷佇虛榮設下 ê 騙局  
予權勢 ê 油煙包圍身邊利益 ê 霧霧掩 khàm 目矔  
隨在 in 政客壓霸 ê 怪手 kap 財團肥軟 ê 身軀  
公開佇每一个街路相爭咧搶占山頭分食地盤  
放任伊自私 kap 貪心暗中串通勾結  
偷偷隱藏佇無人看著 ê 地下慢慢仔腐敗爛臭  
廢水 kap 糞埽不時利用暗夜做掩護  
數想欲抹烏阮 ê 清白撓臭阮 ê 名聲  
虛偽 ê 燈火是欲按怎安慰阮憂鬱 ê 心事

用懺悔 ê 態度咱謙卑面對土地激烈 ê 抗議  
予伊吞忍久年滿腹 ê 怨氣做一下爆發  
向望會當驚醒咱早就去予過度 ê 貪念麻醉 ê 本性  
用贖罪 ê 心情勇敢接受天意沉重 ê 責罰  
總是愛付出痛苦代價  
才有法度洗清長期受著傷濟慾望污染 ê 靈魂

就算早慢總有一工  
所有同情 ê 口氣 kap 批評 ê 喙瀾攏會親像風湧消退  
我猶原佇遮陪伴  
Kap 你做伙度過這場炎火 ê 淨化大水 ê 洗禮  
繼續用愛  
為你治療傷疼等你復元重生



## 作者感言

**陳正雄** 臺南一中兼任教師

會當佇家己的土地  
用家己的母語  
講家己的心情  
寫家己的故事  
是上歡喜的代誌  
這是咱的權利  
嘛是咱的責任